



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

08.12.2021թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի թիվ ԳԲՔԱ-ՆԳ-2021/88

Հայաստանի Հանրապետության գնումների հետ կապված բողոքներ քննող անձը՝ ի
դեմս Գրիգոր Ներսիսյանի,

Մասնակցությամբ՝

Միասնական սոցիալական ծառայության լիազորված ներկայացուցիչ

Գ. Զանջուղազյանի (լիազորագիր՝ տրված 01.12.2021թ.),

քննելով Միասնական սոցիալական ծառայության կարիքների համար տպագրության և
առաքման ծառայությունների ձեռքբերման նպատակով հայտարարված «ՄՍԾ ԷԱՃԱՇՁԲ-
22/3» ծածկագրով էլեկտրոնային աճուրդի շրջանակներում «Հարդ ընդ Սոֆթ» ՍՊԸ-ի
կողմից 29.11.2021թ. ներկայացված (29.11.2021թ. վարույթ ընդունված) բողոքը (հետայսու
նաև՝ ԳԲՔԱ-ՆԳ-2021/88 բողոք) և կից փաստաթղթերը, պարզեցի հետևյալը.

1. «Հարդ ընդ Սոֆթ» ՍՊԸ-ի կողմից ներկայացված փաստերը, հիմնավորումները և պահանջը.

«Հարդ ընդ Սոֆթ» ՍՊԸ-ն (հետայսու նաև՝ Ընկերություն) 29.11.2021թ. ներկայացված
բողոքով հայտնել է հետևյալը.

«Հարդ ընդ Սոֆթ» ՍՊԸ-ին (այսուհետ նաև՝ Ընկերություն), Միասնական սոցիալական
ծառայության «ՄՍԾ ԷԱՃԱՇՁԲ-22/3» ծածկագրով էլեկտրոնային աճուրդի գնահատող
հանձնաժողովի կողմից, վերոնշյալ աճուրդի արդյունքներով առաջին տեղ զբաղեցրած

մասնակից չճանաչելու և պայմանագիր կնքելու որոշման դեմ ստորև ներկայացվում է հետևյալ բողոքը.

«Հարդ ընդ Սոֆթ» ՍՊԸ-ն 11.11.2021թ.-ին մասնակցել է Միասնական սոցիալական ծառայության կողմից հայտարարած «ՄՄԾ ԷԱՃԱՇՁԲ-22/3» ծածկագրով Էլեկտրոնային աճուրդին (այսուհետ նաև՝ Աճուրդ):

Աճուրդի մասնակցության սկզբնական գինը Ընկերության կողմից եղել է 5280000 (հինգ միլիոն երկու հարյուր ութանասուն հազար) ՀՀ դրամ: Աճուրդի մեկնարկային գինը սահմանվել է 4320000 (չորս միլիոն երեք հարյուր քսան հազար) ՀՀ դրամ: Աճուրդը սկսվելուց հետո գնի նվազեցման քայլի մինիմալ շեմը սահմանվել է 4270000 (չորս միլիոն երկու հարյուր յոթանասուն հազար) ՀՀ դրամը: Ընկերությունը կատարել է աճուրդի գնի նվազեցման քայլի մինիմալ շեմի չափով քայլ՝ 4270000 դրամ, սակայն տեխնիկական պատճառով (համակարգչի ստեղնաշարի, ինչպես նաև աճուրդի ժամանակի սղության պատճառով, քանի որ eauction համակարգի հետ ինձ մոտ խնդիրներ կար և չէի կարողանում մասնակցել աճուրդին և համակարգը միացավ վերջին պահին) մեկ 0 նիշը պակաս է մուտքագրվել համակարգ և Ընկերության կողմից ներկայացված գինը 4 270 000 դրամի փոխարեն ստացվել է 427 000 դրամ: Միայն մուտքագրված թիվը անմիջապես ցանկացել եմ ուղղել (մինչև այլ մասնակցի կողմից հնարավոր նվազեցման կատարումը), սակայն պարզվեց, որ համակարգը նման հնարավորություն չի տալիս: Անմիջապես զանգահարել եմ ՀՀ ֆինանսերի նախարարություն՝ 033 92-01-01 և 011 28-93-21 հեռախոսահամարներով, ներկայացրել եմ խնդիրը և ստացել պատասխան, որ դիմեմ Պատվիրատուին: Անմիջապես գրությամբ դիմել եմ պատվիրատուին՝ մրցույթի հանձնաժողովի քարտուղարի պաշտոնական կայքին գրություն ուղարկելով, ներկայացնելով խնդիրը, մեջբերում եմ՝

Խնդրում եմ «Հարդ ընդ Սոֆթ» ՍՊԸ կողմից 11.11.2021թ.-ի «ՄՄԾ ԷԱՃԱՇՁԲ-22/3» ծածկագրով Էլեկտրոնային աճուրդին ներկայացված գինը 427 000 (չորս հարյուր քսանյոթ հազար) ՀՀ դրամի փոխարեն կարդալ 4270000 (չորս միլիոն երկու հարյուր յոթանասուն հազար) ՀՀ դրամ:

Որպես հիմնավորում գնի նվազեցման տեխնիկական պատճառի (վրիպակի) ներկայացնեմ, որ 60 000 հատ Կենսաթոշակի գործի կազմի (թուղթ կավճապատ /ֆուտբոր/՝ 300գ/մ.ք, բացված չափսերը 47x32սմ) տպագրության համար պահանջվում է մոտ 3150կգ. թուղթ, որի մեկ կիլոգրամի շուկայական արժեքը 1100 դրամ է: Այսպիսով՝

3150կգ. x 1100դր. = 3 465 000դր.: (սա միայն թղթի մասով, դրան գումարվում է նաև այլ տպագրական ծախսեր՝ ներկ, ֆորմաներ, էլ. էներգիա, աշխատավարձ, տրանսպորտային ծախսեր, հարկեր և այլն):

Համաձայն «ՄՍԾ ԷԱՃԱՇՁԲ-22/3» ծածկագրով էլեկտրոնային աճուրդի հրավերի 1-ին մասի 5.1 կետի, մեջբերում եմ՝ «5.1 Առաջարկվող գինը աշխատանքի արժեքից բացի ներառում է փոխադրման, ապահովագրման, տուրքերի, հարկերի, այլ վճարումների գծով ծախսերը և չի կարող պակաս լինել դրանց ինքնարժեքից»: Տվյալ դեպքում 4 270 000 դրամ արժողությամբ տպագրական աշխատանքների վերոնշյալ ինքնարժեքը չի կարող մտնել վրիպակի արդյունքում ստացված գնի՝ 427 000 դրամի մեջ:

Որպես հիմնավորում ներկայացնեմ նաև հետևյալ հանգամանքը.

Ընկերության կողմից աճուրդի մասնակցության սկզբնական գինը ինչպես նշեցի 5280000 ՀՀ դրամ էր և տրամաբանական չէ 5 280 000դրամից մեկ քայլով նվազեցնել մինչև 427 000դրամ: Նշեմ նաև, որ երկրորդ տեղը զբաղեցրած մասնակցի նվազագույն գինը՝ 4 320 000 դրամ է, երրորդ տեղինը՝ 4590000 դրամ, չորրորդ տեղինը՝ 5034000 դրամ, հինգերորդ տեղինը՝ 5232500 դրամ, վեցերորդ տեղինը՝ 6900000 դրամ:

Հարգելի բողոքներ քննող Անձ, «Հարդ ընդ Սոֆթ» ՍՊԸ տարիներ շարունակ հանդիսացել և հանդիսանում է վստահելի և բարեխիղճ գործընկեր, իր բոլոր պայմանագրային պարտավորությունները միշտ կատարել է ժամանակին և պատշաճ կերպով և այժմ էլ Ընկերության կողմից Ձեզ դիմումը միտված չէ որևէ պարտավորության կատարման խուսափումից, այլ ինչպես ներկայացվեց ուղղակի անհնար է նման գնով պատվերի կատարումը»:

Ամփոփելով վերոգրյալը՝ Ընկերությունը խնդրել է՝

1. Արգելել Պատվիրատու ՀՀ աշխատանքի և սոցիալական հարցերի նախարարության Միասնական սոցիալական ծառայության «ՄՍԾ ԷԱՃԱՇՁԲ-22/3» ծածկագրով Ընթացակարգի գնահատող հանձնաժողովի գործողությունները՝ ընդհուպ մինչև պայմանագիր կնքելու գործընթացը:

2. Պարտավորեցնել Պատվիրատու ՀՀ աշխատանքի և սոցիալական հարցերի նախարարության Միասնական սոցիալական ծառայության «ՄՍԾ ԷԱՃԱՇՁԲ-22/3» ծածկագրով Ընթացակարգի գնահատող հանձնաժողովին անվավեր ճանաչել 12.11.2021թ. ժամը 10:15-ի թիվ 2 արձանագրության 1-ին կետի բ) ենթակետով Բողոքաբերի կողմից ներկայացված 427 000 դրամի մասով տողը:

3. Պարտավորեցնել Պատվիրատու ՀՀ աշխատանքի և սոցիալական հարցերի նախարարության Միասնական սոցիալական ծառայության «ՄՍԾ ԷԱՃԱՇՁԲ-22/3» ծածկագրով Ընթացակարգի գնահատող հանձնաժողովին 12.11.2021թ. ժամը 10:15-ի թիվ 2 արձանագրության 1-ին կետի բ) ենթակետով Բողոքաբերի կողմից ներկայացված գնային առաջարկի տողում, որպես վերջինիս առաջարկած գին սահմանել 4.270.000 դրամը:

4. Պարտավորեցնել Պատվիրատու ՀՀ աշխատանքի և սոցիալական հարցերի նախարարության Միասնական սոցիալական ծառայության «ՄՍԾ ԷԱՃԱՇՁԲ-22/3» ծածկագրով Ընթացակարգի գնահատող հանձնաժողովին անվավեր ճանաչել 16.11.2021թ. ժամը 11:40-ի թիվ 3 արձանագրությունը:

Ընկերությունը, պատշաճ ծանուցված լինելով բողոքի քննության նպատակով 03.12.2021թ. ժամը 09:10-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

2. Միասնական սոցիալական ծառայության կողմից բողոքի վերաբերյալ ներկայացված դիրքորոշումը և հիմնավորումները.

Միասնական սոցիալական ծառայությունը (հետայսու նաև՝ Պատվիրատու) Գնումների հետ կապված բողոքներ քննող անձին ուղղված 03.12.2021թ. թիվ 02/ԳՋ/53529-2021 գրությամբ հայտնել է հետևյալը.

«2021 թվականի նոյեմբերի 29-ին «Հարդ ընդ Սոֆթ» ՍՊԸ -ի կողմից ներկայացրած թիվ ԳԲԲԱ-ՆԳ-2021/88 բողոքի վերաբերյալ հայտնում ենք հետևյալը.

2021 թվականի նոյեմբերի 2-ին Միասնական սոցիալական ծառայության (այսուհետ՝ Ծառայություն) կողմից հայտարարվել է Ծառայության կարիքների համար տպագրության և առաքման ծառայությունների գնման ընթացակարգ՝ ՄՍԾ ԷԱՃԱՇՁԲ-22/3 ծածկագրով:

Գնման ընթացակարգի շրջանակում հայտեր են ներկայացրել թվով վեց կազմակերպություններ՝ այդ թվում «Հարդ ընդ Սոֆթ» ՍՊԸ-ն (այսուհետ՝ Ընկերություն):

Գնման ընթացակարգը կազմակերպելու և հայտը գնահատելու հիմքում ընկած իրավական հիմնավորումները.

ՄՍԾ ԷԱՃԱՇՁԲ-22/3 ծածկագրով գնման ընթացակարգը կազմակերպվել է գնումների մասին ՀՀ օրենսդրությամբ սահմանված պահանջներին համապատասխան:

Հայտերի ներկայացման վերջնաժամկետ է սահմանվել 2021 թվականի նոյեմբերի 10-ը, հակադարձ աճուրդը տեղի է ունեցել 2021թ նոյեմբերի 11-ին:

Գնումների մասին ՀՀ օրենսդրությամբ և հրավերի 8.9 կետով սահմանված պահանջների համապատասխան՝ աճուրդն ամփոփվելուն հաջորդող աշխատանքային օրը հրավիրված գնահատող հանձնաժողովի նիստում գնահատվել է գնումների էլեկտրոնային (eauction.armeps.am) համակարգի միջոցով առաջին տեղը զբաղեցրած մասնակցի կողմից համակարգով ներկայացրած հայտում ներառված փաստաթղթերի՝ ՄՍԾ ԷԱՃԱՇՁԲ-22/3 ծածկագրով հրավերի պահանջներին համապատասխանության հանգամանքը:

Գնահատող հանձնաժողովի կողմից Ընկերության ներկայացրած հայտը գնահատվել է բավարար և վերջինս էլեկտրոնային (eauction.armeps.am) համակարգի կողմից հայտարարվել է ընտրված մասնակից: Գնահատող հանձնաժողովի կողմից հայտերի գնահատումը կատարվում է «Գնումների մասին» ՀՀ օրենքի 34-րդ հոդվածի, ՀՀ կառավարության 2017թ. մայիսի 4-ի N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ), ՀՀ կառավարության 2017 թվականի մայիսի 18-ի N 534-Ն որոշմամբ հաստատված «Էլեկտրոնային աճուրդի իրականացման» կարգի (այսուհետ՝ Աճուրդի կարգ) և այլ իրավական ակտերի, հրավերի 1-ին մասի 8-րդ բաժնով սահմանված պահանջներին համապատասխան:

Հանձնաժողովը Աճուրդի կարգ 10-րդ կետի պահանջներին համապատասխան գնահատում է էլեկտրոնային (eauction.armeps.am) համակարգի կողմից 1-ին տեղ զբաղեցրած մասնակցի համակարգով ներկայացրած հայտի փաստաթղթերը և իրավասու չէ գնահատել առաջարկված գնի արժանահավատությունը: Մասնակիցները գնային առաջարկը ներկայացնում են հրավերի 1-ին մասի 5-րդ բաժնով սահմանված պահանջների համաձայն և մասնակցից չի կարող պահանջվել, որ նա ներկայացնի գնային առաջարկի հիմնավորումներ կամ որևէ այլ տիպի տեղեկություններ կամ փաստաթղթեր, ինչպես նաև մասնակցի շահույթի չափը չի կարող հրավերով սահմանափակվել:

Հիմք ընդունելով հայտերը գնահատելու իրավական հիմքերը, գնման ընթացակարգը կազմակերպվել է գնումների մասին ՀՀ օրենսդրության տառին համապատասխան, գնահատող հանձնաժողովի կողմից կայացրած որոշումները իրավաչափ են, համապատասխանում են գնումների մասին ՀՀ օրենսդրությանը, հետևաբար բողոքը անհիմն է և ենթակա է մերժման»:

Պատվիրատուն, պատշաճ ծանուցված լինելով բողոքի քննության նպատակով 03.12.2021թ. ժամը 09:10-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով իր հերթին պնդել է վերը շարադրված դիրքորոշումը:

3. ԳՐՔԱ-ՆԳ-2021/88 բողոքի քննության համար էական նշանակություն ունեցող փաստերը.

ԳՐՔԱ-ՆԳ-2021/88 բողոքի քննության համար էական նշանակություն ունեն հետևյալ փաստերը.

1. Միասնական սոցիալական ծառայության կարիքների համար տպագրության և առաքման ծառայությունների ձեռքբերման նպատակով հայտարարվել է «ՄՍԾ ԷԱՃԱՇՁԲ-22/3» ծածկագրով էլեկտրոնային աճուրդ (հետայսու նաև՝ Ընթացակարգ), որին մասնակցության հայտ է ներկայացրել «Հարդ ընդ Սոֆթ» ՍՊԸ-ն:

2. «Հարդ ընդ Սոֆթ» ՍՊԸ-ն Պատվիրատուին ուղղված 11.11.2021թ. դիմումով հայտնել է հետևյալը.

««Հարդ ընդ Սոֆթ» ՍՊԸ-ն 11.11.2021թ.-ին մասնակցել է Միասնական սոցիալական ծառայության կողմից հայտարարված «ՄՍԾ ԷԱՃԱՇՁԲ-22/3» ծածկագրով էլեկտրոնային աճուրդին: Աճուրդի մասնակցության սկզբնական գինը Ընկերության կողմից եղել է 5280000 (հինգ միլիոն երկու հարյուր ութսուն հազար) ՀՀ դրամ: Աճուրդի մեկնարկային գինը սահմանվել է 4320000 (չորս միլիոն երեք հարյուր քսան հազար) ՀՀ դրամ: Աճուրդը սկսվելուց հետո գնի նվազեցման քայլի մինիմալ շեմը սահմանվել է 4270000 (չորս միլիոն երկու հարյուր յոթանասուն հազար) ՀՀ դրամը: Ընկերությունը հաշվարկել է և ցանկացել կատարել աճուրդի գնի նվազեցման քայլի մինիմալ շեմի չափով քայլ՝ 4270000 դրամ, սակայն տեխնիկական պատճառով մեկ 0 նիշը պակաս է մուտքագրվել համակարգ և Ընկերության կողմից ներկայացված գինը 4270000 դրամի փոխարեն ստացվել է 427000 դրամ:

Խնդրում եմ «Հարդ ընդ Սոֆթ» ՍՊԸ-ի կողմից 11.11.2021թ. «ՄՍԾ ԷԱՃԱՇՁԲ-22/3» ծածկագրով էլեկտրոնային աճուրդին ներկայացված գինը 427000 (չորս հարյուր քսանյոթ հազար) ՀՀ դրամի փոխարեն կարդալ 4270000 (չորս հարյուր քսանյոթ հազար) ՀՀ դրամ:

Որպես հիմնավորում գնի նվազեցման տեխնիկական պատճառի (վրիպակի) ներկայացնեմ, որ 60 000 հատ Կենսաթոշակի գործի կազմի տպագրության համար

պահանջվում է 3150կգ Futbort թուղթ, որի մեկ կիլոգրամի արժեքը 1100 դրամ է: Այսպիսով 3150կգ×1100դր=3 465 000դր: (սա միայն թղթի մասով, դրան գումարվում է նաև այլ տպագրական ծախսեր՝ ներկ, ֆորմաներ, էլ. էներգիա, աշխատավարձ և այլն):

Որպես հիմնավորում ներկայացնեմ նաև հետևյալ հանգամանքը.

Ընկերության կողմից աճուրդի մասնակցության սկզբնական գինը ինչպես նշեցի 5280000 ՀՀ դրամ էր և տրամաբանական չէ 5 280 000 դրամից մեկ քայլով նվազեցնել մինչև 427000 դրամ: Նշեմ նաև, որ երկրորդ տեղը զբաղեցրած մասնակցի նվազագույն գինը՝ 4 320 000 դրամ է, երրորդ տեղինը՝ 4590000 դրամ, չորրորդ տեղինը՝ 5034000 դր, հինգերորդ տեղինը՝ 5232500դր, վեցերորդ տեղինը՝ 6900000դր»:

3. Ընթացակարգի գնահատող հանձնաժողովի 16.11.2021թ. նիստի թիվ 3 արձանագրության համաձայն՝ ներկայացված գնային առաջարկների և հայտերի գնահատման արդյունքների հիման վրա հանձնաժողովը որոշում է կայացրել «Հարդ ընդ Սոֆթ» ՍՊԸ-ին, որպես ընտրված մասնակից ճանաչելու և հրավերով սահմանված անգործության ժամկետի ավարտից հետո վերջինիս պայմանագիր կնքելու առաջարկ ներկայացնելու վերաբերյալ:

4. «Հարդ ընդ Սոֆթ» ՍՊԸ-ի կողմից Ընթացակարգի շրջանակներում 29.11.2021թ. ներկայացվել է բողոք:

4. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով «Հարդ ընդ Սոֆթ» ՍՊԸ-ի 29.11.2021թ. բողոքը՝ կից փաստաթղթերով, Միասնական սոցիալական ծառայության դիրքորոշումը և գործում առկա փաստաթղթերը, հայտնում եմ հետևյալը.

«Գնումների մասին» ՀՀ օրենքի (հետայսու նաև՝ Օրենք) 3-րդ հոդվածի 2-րդ մասի համաձայն՝ գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում.

3) ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:

«ՀՀ կառավարության 2017 թվականի մայիսի 18-ի N 534-Ն որոշմամբ հաստատված «Էլեկտրոնային աճուրդի իրականացման» կարգի (հետայսու նաև՝ Կարգ) 4-րդ կետի համաձայն՝ սույն կարգում օգտագործվում են հետևյալ հասկացությունները՝

1) էլեկտրոնային աճուրդի համակարգ (այսուհետ՝ համակարգ)՝ էլեկտրոնային աճուրդների իրականացումն ապահովող համակարգ (www.armeps.am/eaction).

2) մասնակից՝ պատվիրատուի հետ պայմանագիր կնքելու նպատակով էլեկտրոնային աճուրդին մասնակցելու ցանկություն ունեցող և համակարգում գրանցված անձ.

3) էլեկտրոնային աճուրդ՝ էլեկտրոնային միջոցների օգտագործմամբ նոր՝ նվազեցված գները ներկայացնելու գործընթաց, որը հնարավորություն է տալիս ավտոմատ գնահատման մեթոդներով (միջոցներով) որոշելու հայտեր ներկայացրած մասնակիցների զբաղեցրած տեղերը՝ հաջորդականությունը.

4) հայտ՝ հրավերի հիման վրա մասնակցի կողմից էլեկտրոնային եղանակով ներկայացվող առաջարկ.

5) լիազորված մարմին՝ Հայաստանի Հանրապետության ֆինանսների նախարարություն.

6) օգտվողներ՝ համակարգի շահագործման և դրանից օգտվելու թույլտվություն ունեցող անձինք.

7) քայլ՝ մինչև էլեկտրոնային աճուրդի ամփոփումը՝ մասնակցի կողմից վերանայված և ներկայացված նոր՝ նվազեցված գնային առաջարկ.

8) առաջին տեղն զբաղեցրած մասնակից՝ մասնակից, որն էլեկտրոնային աճուրդի ամփոփման համար սահմանված ժամկետը լրանալու պահի դրությամբ ներկայացրել է նվազագույն գնային առաջարկ:

Կարգի 15-րդ կետի համաձայն՝ մինչև աճուրդի ամփոփման համար հրավերով սահմանված ժամկետը լրանալը՝ համակարգն ավտոմատ եղանակով մասնակիցներին ներկայացնում է յուրաքանչյուր մասնակցի քայլը և այն կատարելու օրը, ժամը:

Կարգի 16-րդ կետի համաձայն՝ աճուրդն ամփոփվում է հրավերում նշված կոնկրետ ժամը լրանալու դրությամբ կամ սույն կարգի 10-րդ կետի 1-ին ենթակետով նախատեսված դեպքում:

Կարգի 17-րդ կետի համաձայն՝ աճուրդն ամփոփվելու պահի դրությամբ համակարգն ավտոմատ եղանակով պատվիրատուին և հայտեր ներկայացրած մասնակիցներին ներկայացնում է աճուրդի արդյունքները՝ ըստ առաջին և հաջորդաբար տեղեր զբաղեցրած մասնակիցների անվանումների և զբաղեցրած տեղերի:

Ընթացակարգի հայտարարության համաձայն՝ Ընտրված մասնակիցը որոշվում է հրավերի պահանջներին բավարար գնահատված հայտեր ներկայացրած մասնակիցների թվից՝ էլեկտրոնային աճուրդի արդյունքում նվազագույն գնային առաջարկ ներկայացրած մասնակցին նախապատվություն տալու սկզբունքով:

Ընթացակարգի հրավերի 1-ին մասի 8-րդ կետի 8.1, 8.4, 8.5 և 8.6 ենթակետերի համաձայն՝

8.1 Սույն հրավերով սահմանված՝ հայտերը ներկայացնելու վերջնաժամկետը լրանալու պահի դրությամբ համակարգն հայտեր ներկայացրած բոլոր մասնակիցներին և գնահատող հանձնաժողովի բոլոր անդամներին միաժամանակ ավտոմատ եղանակով ուղարկում է ներկայացված նվազագույն գնային առաջարկը՝ առանց ավելացված արժեքի հարկի գումարի, ըստ չափաբաժինների էլեկտրոնային աճուրդը սկսելու օրը և ժամը, ինչպես նաև օգտագործվող էլեկտրոնային սարքավորումների հետ անհատական կապուղի հաստատելու համար անհրաժեշտ տվյալները: Եթե սույն ընթացակարգը բողոքարկվել է մինչև հայտերի ներկայացման վերջնաժամկետը լրանալը և առկա չէ ընթացակարգի կասեցումը հանելու մասին գնումների հետ կապված բողոքներ քննող անձի որոշում, ապա սույն կետով նախատեսված տեղեկատվությունը համակարգը մասնակիցներին ուղարկում է բողոքի վերաբերյալ կայացված որոշումն ուժի մեջ մտնելուն հաջորդող աշխատանքային օրվա ժամը 16:00-ն: Ընդ որում անկախ ընթացակարգը կասեցված լինելու հանգամանքից, մասնակիցներն ունեն մինչև սույն հրավերով հայտերի ներկայացման վերջնաժամկետը լրանալը հայտեր ներկայացնելու, ներկայացված հայտերը փոխելու կամ հետ վերցնելու հնարավորություն:

8.4 Աճուրդի ընթացքում ըստ չափաբաժինների կատարվող յուրաքանչյուր քայլի արդյունքում նվազեցվող գումարը չպետք է պակաս լինի աճուրդն սկսելու պահին այդ չափաբաժնի մասով ներկայացված նվազագույն գնային առաջարկի մեկ տոկոսից: Ընդ որում նվազեցվող գնային առաջարկները ներկայացվում են պայմանագրի կատարման համար առաջարկվող ընդհանուր գնով, որը հաշվարկվում է քանակ \times միավորի գին բանաձևով: Այն մասնակիցները, որոնք տվյալ գործարքի գծով Հայաստանի

Հանրապետության պետական բյուջե պետք է վճարեն ավելացված արժեքի հարկ, նվազեցվող գները ներկայացնում են առանց այդ հարկի գումարի հաշվարկման: Եթե տվյալ չափաբաժնի գծով աճուրդի ընդհանուր տևողության ընթացքում (30 րոպե) որևէ քայլ կատարելու պահից հաշված 5-րդ րոպեն լրանալը չի կատարվում նոր քայլ, ապա 5-րդ րոպեն լրանալու պահի դրությամբ աճուրդը տվյալ չափաբաժնի մասով համարվում է ամփոփված, և վերջին քայլը կատարած մասնակիցը համարվում է առաջին տեղն զբաղեցրած մասնակից:

8.5 Մինչև աճուրդի ամփոփման համար սույն հրավերով սահմանված ժամկետը լրանալը՝ համակարգն ավտոմատ եղանակով մասնակիցներին ներկայացնում է յուրաքանչյուր մասնակցի քայլը և այն կատարելու օրը, ժամը:

8.6 Աճուրդի բոլոր չափաբաժինների արդյունքներն ամփոփվելուց անմիջապես հետո համակարգի հրապարակային էջի "Հայտեր բաժնում" ավտոմատ եղանակով հրապարակվում են ըստ յուրաքանչյուր չափաբաժնի համար սույն ընթացակարգի շրջանակում գնվելիք աշխատանքների համար գնման հայտով սահմանված գները, աճուրդի արդյունքում ըստ չափաբաժինների որոշված ինչպես առաջին տեղը զբաղեցրած, այնպես էլ մյուս մասնակիցների անվանումներն ու վերջիններիս կողմից ինչպես հայտով, այնպես էլ աճուրդն ամփոփվելու պահի դրությամբ ներկայացված գներն ու հայտով ներկայացված փաստաթղթերը: Համակարգը սույն կետով նախատեսված տեղեկատվությունը միաժամանակ ավտոմատ եղանակով ուղարկում է գնահատող հանձնաժողովի անդամներին, քարտուղարին և հայտեր ներկայացրած մասնակիցներին:

Այսպես, Միասնական սոցիալական ծառայության կարիքների համար տպագրության և առաքման ծառայությունների ձեռքբերման նպատակով հայտարարվել է «ՄՄԾ ԷԱՃԱՇՁԲ-22/3» ծածկագրով էլեկտրոնային աճուրդ, որին մասնակցության հայտ է ներկայացրել «Հարդ ընդ Սոֆթ» ՍՊԸ-ն:

«Հարդ ընդ Սոֆթ» ՍՊԸ-ն Պատվիրատուին ուղղված 11.11.2021թ. դիմումով հայտնել է հետևյալը.

««Հարդ ընդ Սոֆթ» ՍՊԸ-ն 11.11.2021թ.-ին մասնակցել է Միասնական սոցիալական ծառայության կողմից հայտարարված «ՄՄԾ ԷԱՃԱՇՁԲ-22/3» ծածկագրով էլեկտրոնային աճուրդին: Աճուրդի մասնակցության սկզբնական գինը Ընկերության կողմից եղել է 5280000 (հինգ միլիոն երկու հարյուր ութսուն հազար) ՀՀ դրամ: Աճուրդի մեկնարկային գինը սահմանվել է 4320000 (չորս միլիոն երեք հարյուր քսան հազար) ՀՀ դրամ: Աճուրդը

սկսվելուց հետո գնի նվազեցման քայլի մինիմալ շեմը սահմանվել է 4270000 (չորս միլիոն երկու հարյուր յոթանասուն հազար) ՀՀ դրամը: Ընկերությունը հաշվարկել է և ցանկացել կատարել աճուրդի գնի նվազեցման քայլի մինիմալ շեմի չափով քայլ՝ 4270000 դրամ, սակայն տեխնիկական պատճառով մեկ 0 նիշը պակաս է մուտքագրվել համակարգ և Ընկերության կողմից ներկայացված գինը 4270000 դրամի փոխարեն ստացվել է 427000 դրամ:

Խնդրում եմ «Հարդ ընդ Սոֆթ» ՍՊԸ-ի կողմից 11.11.2021թ. «ՄՍԾ ԷԱՃԱՇՁԲ-22/3» ծածկագրով էլեկտրոնային աճուրդին ներկայացված գինը 427000 (չորս հարյուր քսանյոթ հազար) ՀՀ դրամի փոխարեն կարդալ 4270000 (չորս հարյուր քսանյոթ հազար) ՀՀ դրամ:

Որպես հիմնավորում գնի նվազեցման տեխնիկական պատճառի (վրիպակի) ներկայացնեմ, որ 60 000 հատ Կենսաթոշակի գործի կազմի տպագրության համար պահանջվում է 3150կգ Futbort թուղթ, որի մեկ կիլոգրամի արժեքը 1100 դրամ է: Այսպիսով $3150կգ \times 1100դր = 3\ 465\ 000դր$: (սա միայն թղթի մասով, դրան գումարվում է նաև այլ տպագրական ծախսեր՝ ներկ, ֆորմաներ, էլ. էներգիա, աշխատավարձ և այլն):

Որպես հիմնավորում ներկայացնեմ նաև հետևյալ հանգամանքը.

Ընկերության կողմից աճուրդի մասնակցության սկզբնական գինը ինչպես նշեցի 5280000 ՀՀ դրամ էր և տրամաբանական չէ 5 280 000 դրամից մեկ քայլով նվազեցնել մինչև 427000 դրամ: Նշեմ նաև, որ երկրորդ տեղը զբաղեցրած մասնակցի նվազագույն գինը՝ 4 320 000 դրամ է, երրորդ տեղինը՝ 4590000 դրամ, չորրորդ տեղինը՝ 5034000 դր, հինգերորդ տեղինը՝ 5232500դր, վեցերորդ տեղինը՝ 6900000դր»:

Ընթացակարգի գնահատող հանձնաժողովի 16.11.2021թ. նիստի թիվ 3 արձանագրության համաձայն՝ ներկայացված գնային առաջարկների և հայտերի գնահատման արդյունքների հիման վրա հանձնաժողովը որոշում է կայացրել «Հարդ ընդ Սոֆթ» ՍՊԸ-ին, որպես ընտրված մասնակից ճանաչելու և հրավերով սահմանված անգործության ժամկետի ավարտից հետո վերջինիս պայմանագիր կնքելու առաջարկ ներկայացնելու վերաբերյալ:

«Հարդ ընդ Սոֆթ» ՍՊԸ-ի կողմից Ընթացակարգի շրջանակներում 29.11.2021թ. ներկայացվել է բողոք:

Այսպիսով՝ Ընթացակարգի հրավերի 8.1 կետը հստակ սահմանում է, որ հրավերով սահմանված՝ հայտերը ներկայացնելու վերջնաժամկետը լրանալու պահի դրությամբ **համակարգն հայտեր ներկայացրած բոլոր մասնակիցներին և գնահատող**

հանձնաժողովի բոլոր անդամներին միաժամանակ ավարտապես եղանակով ուղարկում է ներկայացված նվազագույն գնային առաջարկը, իսկ Կարգի 17-րդ կետի համաձայն՝ աճուրդն ամփոփվելու պահի դրությամբ համակարգն ավարտապես եղանակով պատվիրատուին և հայտեր ներկայացրած մասնակիցներին ներկայացնում է աճուրդի արդյունքները՝ ըստ առաջին և հաջորդաբար տեղեր զբաղեցրած մասնակիցների անվանումների և զբաղեցրած տեղերի:

Ընթացակարգի հայտարարության համաձայն՝ Ընտրված մասնակիցը որոշվում է հրավերի պահանջներին բավարար գնահատված հայտեր ներկայացրած մասնակիցների թվից՝ էլեկտրոնային աճուրդի արդյունքում նվազագույն գնային առաջարկ ներկայացրած մասնակցին նախապատվություն տալու սկզբունքով:

16.11.2021թ. նիստի թիվ 3 արձանագրության համաձայն՝ «Հարդ ընդ Սոֆթ» ՍՊԸ-ի կողմից ներկայացված գնային առաջարկի հիման վրա հանձնաժողովը որոշում է կայացրել Ընկերությանն ընտրված մասնակից ճանաչելու վերաբերյալ:

Գտնում եմ, որ Ընկերության կողմից ներկայացված բողոքով, որպես հիմնավորում ներկայացված հանգամանքը, այն է՝ «տեխնիկական պատճառով (համակարգչի ստեղծաշարի, ինչպես նաև աճուրդի ժամանակի սղության պատճառով, քանի որ e-auction համակարգի հետ ինձ մոտ խնդիրներ կար և չէի կարողանում մասնակցել աճուրդին և համակարգը միացավ վերջին պահին) մեկ 0 նիշը պակաս է մուտքագրվել համակարգ և Ընկերության կողմից ներկայացված գինը 4 270 000 դրամի փոխարեն ստացվել է 427 000 դրամ», և այդ հիմնավորմամբ ներկայացված պահանջն Ընթացակարգի գնահատող հանձնաժողովին 12.11.2021թ. ժամը 10:15-ի թիվ 2 արձանագրության 1-ին կետի բ) ենթակետով Բողոքաբերի կողմից ներկայացված գնային առաջարկի տողում, որպես վերջինիս առաջարկած գին 4 270 000 դրամ սահմանելուն պարտավորեցնելու վերաբերյալ չի կարող բավարարվել, քանի որ Գնումների հետ կապված բողոքներ քննող անձն իր կողմից կայացված որոշմամբ չի կարող պարտավորեցնել Ընթացակարգի գնահատող հանձնաժողովին հիմք ընդունելու Ընկերության կողմից կամայական ներկայացված որևէ թիվ, տվյալ դեպքում՝ 4 270 000 դրամ:

Միևնույն ժամանակ հարկ եմ համարում հայտնել, որ Ընկերության կողմից գնային առաջարկով ներկայացված գնի և դրանից բխող հետևանքներն ու պատասխանատվությունը պետք է կրի Ընկերությունը:

Վերոգրյալի հաշվառմամբ՝ գտնում եմ, որ «Հարդ ընդ Սոֆթ» ՍՊԸ-ի կողմից ներկայացված բողոքն ամբողջությամբ անհիմն է և ենթակա է մերժման:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝

Ո Ր Ո Շ Ե Ց Ի

«Հարդ ընդ Սոֆթ» ՍՊԸ-ի կողմից 29.11.2021թ. ներկայացված բողոքը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ գնումների հետ կապված բողոքներ քննող անձի որոշումն ուժի մեջ է մտնում այն տեղեկագրում հրապարակելուն հաջորդող օրվանից:

**Գնումների հետ կապված
բողոքներ քննող անձ՝**



ԳՐԻԳՈՐ ՆԵՐՍԻՍՅԱՆ